

दिनांक 12.11.2025

समय: 18.45 बजे

- प्रधानमंत्री नरेन्द्र मोदी लारला दिनां दिल्ली मांय कार मांय व्ह्या धमाका रे कारण ज़ख्मी लोगां री साता पूछण सारू अस्पताल पूग्या।
- पुलिस महानिदेशक राजीव कुमार शर्मा कह्यो-नशीली चीजां ने एक ऊं दूजा राज्य मांय लावण-ले-जावण माथे रोक लगावण सारू सगळा संभव जतन कर्या जावेला।
- प्रदेश मांय 5 साल ताई रा बच्चां ने न्यूमोनिया ऊं बचावण सारू सांस अभियान चलायी ज्यो।
- प्रदेश मांय घणखर ठोड़ां रात री बगत पारो उतरण ऊं ठंड रो असर बध्यो- आवता दिनां तापमान मांय और कमी रा आसार।

000

प्रधानमंत्री नरेन्द्र मोदी दिल्ली मांय लालकिला कने कार मांय व्ह्या धमाका रे कारण ज़ख्मी व्ह्या लोगां री आज लोक नायक जय प्रकाश नारायण अस्पताल मांय साता पूछी। भूटान रा दो दिन रा दौरा पाछे आज दिल्ली पूगता ही श्री मोदी अस्पताल जा र ज़ख्मी लोगां सागे बातचीत कीनी, हाल-चाल पूछ्यो अर वां रे बेगा ई ठीक व्हेवण री कामना कीनी। अस्पताल रा अहलकार अर डॉक्टर ई वां ने ई बारा मांय जाणकारी दीनी। एक सोशल मीडिया पोस्ट मांय प्रधानमंत्री कह्यो के ई साजिश रा जिम्मेदार लोगां ने न्याय रा कटघरा मांय ऊबा कर्या जावेला।

000

राज्य सरकार 5 ज़िलां रा 2 हजार 226 गांवां रे अभावग्रस्त व्हेवण रो ऐलाण कीनो है। आं गांवां मांय बाढ़ रे कारण एक तिहाई या बत्ता फसल खराबा वाळा किसानां ने कृषि अनुदान दियो जावेला। आपदा प्रबंधन, सहायता अर नागरिक सुरक्षा विभाग री उप शासन सचिव शैफाली कुशवाहा बतायो के ई फैसला ऊं अजमेर, अलवर, झुंझनूं, कोटा अर पाली ज़िलां री 28 तहसीलां रा किसानां ने साता मिलेला।

000

जयपुर मांय आज एंटी-नारकोटिक्स टास्क फोर्स-एएनटीएफ रो नुवो दफ्तर खुल्यो। पुलिस महानिदेशक राजीव कुमार शर्मा इण रो उद्घाटन कीनो। ई मौके वे कह्यो के एएनटीएफ ने वां रो मकसद पूरो करण सारू ज़रूरी सगळा साधन मुहैया कराया जावेला। श्री शर्मा कह्यो के नशा ऊं जुड़ी हलचल रोकण सारू केंद्र अर राज्य री एजेंसियां कानी ऊं मिल र काम करण री सरूआत करीजी है। डी.जी.पी. कह्यो के नशीली चीजां ने एक ऊं दूजा राज्य मांय लावण-ले-जावण माथे रोक लगावण सारू हर संभव कोशिश करी जा रही है।

000

आज लोक सेवा प्रसारण दिवस है। साल 1947 मांय 12 नवंबर ने राष्ट्रपिता महात्मा गांधी कानी ऊं आकाशवाणी ऊं दिया ज्या ऐतिहासिक संबोधन री याद मांय हर साल ओ दिवस मनायो जावे है। ई दिन महात्मा गांधी पहली दफा आकाशवाणी रा दिल्ली स्टूडियो मांय पधार्या हा। वो दीवाळी रो दिन हो अर बापू पाकिस्तान ऊं आ र कुरुक्षेत्र मांय डेरो गालण वाळां ने संबोधित कीना हा।

000

राष्ट्रीय गीत वंदे मातरम् रा डोढ़ सौ साल पूरा व्हेवण रा सिलसिला मांय राज्य मांय ई न्यारा-न्यारा कार्यक्रम राख्या जा रह्या है। भरतपुर री संभागीय आयुक्त डॉ. टीना सोनी वठे रा राजकीय आदित्येन्द्र विद्यालय मांय आज केंद्रीय संचार ब्यूरो जयपुर री ओर ऊं लगायी ज्यी मल्टीमीडिया प्रदर्शनी रो उद्घाटन कीनो। ई मौके डॉ. सोनी कह्यो के आ प्रदर्शनी संभाग रा सगळा स्कूलां रा विद्यार्थियां ने ऑडियो-विजुअल तरीका ऊं बतायी जावेला। प्रदर्शनी मांय सरकार कानी ऊं चलायी जा रही जनता रा भला री योजनावां अर उपलब्धियां री जाणकारी देवण सारू 9 जोन बणायी ज्या है।

000

भगवान बिरसा मुंडा री डोढ़ सौ वीं जयंती रा सिलसिला मांय राज्य मांय आज ई न्यारी—न्यारी ठोड़ां स्वास्थ्य जागरुकता अर चिकित्सा शिविर लगायी ज्या। ब्लॉक स्तर माथे लगायी ज्या आं शिविरां मांय स्वास्थ्य री मुफ्त जांच करी ज्यी। हनुमानगढ़ ज़िला रा संगरिया मांय लगायी ज्या शिविर मांय चिकित्सा कर्मचारियां सागे मोटी तादाद मांय जनता स्वास्थ्य री जांच करायी। भरतपुर रा आंगनबाड़ी केन्द्रां माथे लगायी ज्या शिविरां मांय महिलावां ने स्वास्थ्य ऊं जुड़ी राय दीरीजी।

000

न्यूमोनिया री बीमारी रा बारा मांय जाग जगावण रा मकसद ऊं आज विश्व निमोनिया दिवस मणायी ज्यो। पांच साल ऊं कम उम्र रा बच्चां री न्यूमोनिया रे कारण मौतां ने ध्यान राखता थकां ई साल रो मुद्दो चाइल्ड सर्वाइवल राख्यी ज्यो। ई मौके केंद्रीय स्वास्थ्य मंत्री जगत प्रकाश नड्डा सोशल मीडिया पोस्ट रे जरिये कह्यो के सरकार मजबूत स्वास्थ्य प्रणालियां अर सामुदायिक जागरुकता रे मार्फत बच्चां मांय न्यूमोनिया कम करण सारू केई जतन कर रही है। ई सिलसिला मांय प्रदेश मांय ई न्यारा—न्यारा कार्यक्रम राख्यी ज्या। जयपुर मांय चिकित्सा अर स्वास्थ्य विभाग री ओर ऊं आज सांस अभियान सुरू करी ज्यो। आवता साल 28 फरवरी ताई चलाया जावण वाळा ई अभियान रो मकसद 5 साल ताई रा बच्चां मांय न्यूमोनिया रे कारण व्हेवण वाळी परेशानियां रा बारा मांय जाग जगावणो है। अभियान रा तैत बच्चां मांय न्यूमोनिया री जांच करी जावेला। ई सारू डॉक्टरां अर नर्सिंग कर्मचारियां ने न्यूमोनिया स्किल लैब री सिखावण दीरीजी है। अभियान रा बारा मांय एनएचएम रा मिशन निदेशक डॉ. अमित यादव आज जयपुर मांय वीडियो कांफ्रेंसिंग रे ज़रिए ब्लॉक अर सेक्टर स्तर रा अहलकारां अर कर्मचारियां सागे मीटिंग कर र ज़रूरी हुकम दीना। वे सगळा चिकित्सा संस्थानां, आयुष्मान आरोग्य मंदिरां अर आंगनबाड़ी केन्द्रां माथे बच्चां ने न्यूमोनिया ऊं बचावण ऊं जुड़ी जाणकारी देवण वाळी प्रचार सामग्री रो दरसाव करण बाबत् कह्यो।

000

प्रदेश मांय रात री बगत पारो उतरण ऊं ठंड रो असर बढबा लाग्यो है। घणखर ठौड़ां कम ती कम तापमान सामान्य ऊं 2 ऊं 3 डिग्री सेल्सियस कम दर्ज कर्यो जा रह्यो है। मौसम विभाग रे मुजब लारला 24 घंटां मांय केई ठौड़ां रात री बगत तापमान 8 ऊं साढे 14 डिग्री सेल्सियस बीचे दर्ज करी ज्यो। सब ऊं कम 8 दशमलव 3 डिग्री सेल्सियस न्यूनतम तापमान सीकर मांय दर्ज करी ज्यो , जो सामान्य ऊं करीब साढे 3 डिग्री सेल्सियस कम है। मौसम केन्द्र जयपुर रा निदेशक राधेश्याम शर्मा बतायो के राज्य मांय आवता सप्ताह ताई मौसम सूखो रेहवेला अर रात री बगत तापमान मांय 1 ऊं 2 डिग्री सेल्सियस ताई री गिरावट री संभावना है।

000

राज्य मांय 19 नवम्बर ने सगळा संभागां मांय एके सागे घूमर फेस्टिवल मणायो जावेला। राज्य स्तर रो घूमर फेस्टिवल जयपुर रा विद्याधर नगर स्टेडियम मांय राख्यो जावेला। उपमुख्यमंत्री अर पर्यटन, कला अर संस्कृति मंत्री दिया कुमारी घूमर फेस्टिवल री तैयारियां रो जायजो लेवण सारू जनता रा नुमाइन्दां अर दूजा हितधारकां सागे आज जयपुर मांय मीटिंग कीनी। मीटिंग पाछे खबरनवीसां सागे बातचीत करता थकां दिया कुमारी कह्यो के घूमर राजस्थान री सांस्कृतिक ओळखाण है। वे कह्यो के सगळां ने प्रदेश री पारम्परिक संस्कृति ने दुनिया सामी लावण री कोशिश करनी चाहिजे।

.....

घूमर फेस्टिवल मांय सगळी महिलावां भाग ले सके है। ई सारू पर्यटन विभाग की वेबसाइट माथे मुफ्त नाम मंडाया जा सके है। घूमर री सिखावण देवण सारू घूमर लोकनृत्य वर्कशॉप राख्यी जा रही है। जयपुर रा जवाहर कला केन्द्र मांय काल सारू व्ही वर्कशॉप मांय 12 साल या बत्ती उम्र वाळा भाग ले सके है। आ कार्यशाला 16 नवम्बर ताई चालेला।

000

प्रदेश मांय वोटर लिस्टां रा विशेष गहन पुनरीक्षण रा तैत बूथ लेवल अहलकार—बीएलओ घर—घर जा र गणना प्रपत्र बांट रह्या है। निर्वाचन विभाग रे मुजब हाल ताई साढे तीन करोड़ ऊं बत्ता गणना प्रपत्र वोट देवण रा हकदार लोगां ताई पूगा दिया ज्या है। जनता ने न्यारा—न्यारा कार्यक्रमां रे मार्फत एसआईआर रा बारा मांय जाणकारी दी जा रही है। सवाईमाधोपुर ज़िला रा गंगपुरसिटी, लिवाली अर रामगढ़ मुराड़ा गांव री स्कूलां मांय आज विद्यार्थियां ने ई बारा मांय जाणकारी दीरीजी। पाली ज़िला रा सोजत मांय वोट देवण रा हकदार लोगां ने चुनाव आयोग री वेबसाइट माथे पिरवार वाळां री जाणकारी रा बारा मांय बतायो जा रह्यो है। डूंगरपुर मांय ज़िला कलेक्टर अंकित कुमार सिंह तहसीलदारां अर नायब तहसीलदारां ने वीडियो कॉन्फ्रेंस रे मार्फत एसआईआर रा बारा मांय जाणकारी दीनी।

000